

四庫全書

集部

欽定四庫全書

吳文正集卷六十二

元 吳澄 撰

題跋

題遺方生

生物有一本而無二統恩義有相奪而無兼隆此理也  
亦禮也理者吾心之所固有禮者古訓之所昭垂世有  
不幸當人倫之變而不得以蹈天理之常則權其輕重

而處之以復於正俾於心而安於義而可斯已矣或事  
勢無可柰何而不能然將泯默抱恨以沒齒寧復敢宣  
之於口以語人也此其志之可悲者夫若閭士宗義之  
二姓亦人倫之變常者也宗義宜如之何曰從陳族之  
長擇一人後其舅而已歸于方倘無人可以為後則於  
方氏家歲時為殫以祭其舅至終身而止如是其亦庶  
幾乎噫東晉以後南北分裂果何等時耶而當時猶有  
專攻禮學之士稽諸禮疏所引通典所載可見也亦且

間有通達禮意之婦人焉以今日文物盛多之會承前代義理大明之餘曾謂無一學禮者哉噫

題蕭道士父示兒詩後

身為道士弗獲養親於親之生日饋尊酒親心驚喜作示兒詩傳至予所遂為古今世變而發一慨夫道也者父子之親居其首漢初以老氏清靜之教為道而古聖人設司徒以教人倫但名儒家不得預道之名列在道流之下雖然老氏言道亦曷嘗廢父子之倫哉其後出

家棄親一效西竺而曰道士固如是乎因子之有饋父  
之有詩而知民彛之不可泯也是以識于其詩之左方  
云

龔德元詩跋

龔德元詩已窺簡齋門戶濶步勇進由是而升堂焉而入  
室焉可也

題李伯時九歌後

往歲洪守毛侯以所藏李伯時畫九歌詩本見示予為

作跋語及歌詩今譚觀又持此畫至豈能復措一辭得  
善書人寫予舊跋詩于後可矣然世之好者好李之畫  
而已非好屈之文也誰更論原之心哉予言贅疣爾

跋朱文公與程沙隨帖

朱子手筆人得之者固多此書與沙隨程先生其間質  
正孝經疑義及易疑義則非泛泛徃復之書比也沙隨  
先生經學精深朱子多取其說於朱為大人行故朱子  
以師禮事之書中所質孝經之疑程答書云近見玉山

汪端明亦謂此書多出後人附會朱子然其言載之於孝經刊誤夫朱既不自足而質之於程又不自有而推之於汪前哲為學取長於師友而不自恃蓋如此

題王晉初所藏畫

予每見好畫為程子之戒不敢收蓄今觀晉初所寶頗樂而玩焉豈亦猶有獵心也歟

跋朱子慶元己未十二月四日與益公書

聖賢之道不幸不行於當時猶幸其得明於後世也朱

予以慶元庚申之季春卒此書貽丞相益國周公乃已  
未之季冬相距四月爾當時偽黨之禁如燬殆甚匡人  
桓魋之厄及至我朝表章崇尚與元聖俱何其幸歟雖  
然尊其道在乎上明其道在乎下上之人尊之則至矣  
下之人亦或明之否乎夫見此遺墨而愛重焉者愛重  
其道也朱子之道豈繫此遺墨也哉有已陳之跡有常  
新之心舍其已陳而得其常新朱子之所望於來今也

跋地理書後

大山山人手地理書一卷來叩予閱之有舊術焉有新術焉掇拾青囊之緒餘為是詳說者也抑開青囊不如黑囊山人得之青囊之詳說而加以黑囊之巧視大而不遺千里微而不差一毫雖昔之楊曾復生不過如是而已山人為誰吾里中故人之子表其氏

題李襄公槐圖後

人與物異類也而同生天地之間其氣固流通而無間治世之人康樂而物之生也亦豐榮末世之人勞瘁而

物之生也亦凋耗大而關於一世之盛衰者如此小而  
關於一家之隆替者蓋莫不然觀田氏之荆足以驗其  
家之雍睦觀高氏之柳足以兆其家之貴顯觀王氏之  
槐而知其後之必為三公也一氣之流通自然而然者  
江寧李氏宋南渡前仕宦之多甲於一郡太師襄國公  
諱宗慶歷六年進士內仕至寶文閣待制外仕至西京  
留守高陽關路安撫使子六喪其一存者五公手植槐  
一株垂三百年柯葉扶疎一幹而五枝第四枝尤茂公

之五子曰中奉大夫參曰光祿大夫路曰參知政事回  
曰通直郎畊曰奉直大夫若通直官最卑而儒業之傳  
續至于今不墜槐枝之獨茂若相應云通直之子澤其  
孫繼勲其曾孫如德其元孫彌堂來孫鉤淳祐十年進  
士官至承直質資純雅明六書正俗字之訛承直二子  
養源繇路教授得縣主簿養浩不仕東桓楸彬森楚其  
六孫也俱俊秀可以世其科至元間予客金陵及識承  
直既而識其諸孫獲觀畫史所寫襄公槐蔥鬱可愛竊

謂類同氣之相感應也其理異微物之應者氣動志也  
人之感者志動氣也承直諸孫才矣儻其臻於體信達  
順之道而不局於言語文字之學則一身之和一家之  
和煦姬充溢無物不欣欣焉槐其一爾應而復有感感  
而復有應李氏之隆殆不止如今所觀然此未易為寡  
見謏聞者道也尚因予言而究極之哉夫如是承直其  
有孫矣乎

跋陳氏邱隴圖

中原之族墳墓至今猶古也南土之葬墳墓得聚于一處者鮮矣蓋其偏方土薄水淺之地不得不然雖仁人孝子之心有所甚不安而卒亦莫能變其俗者其說甚長未易一言盡也廬陵陳君景福宦遊無寧日始家于吉後寓於贛葬其母於贛每以二親之葬不得合一為戚又以不能在家守墳墓為憂形而於圖時一展視聲而為賦辭極悽惋藉是聊以塞其戚紓其憂此其中心孝慕之誠不能自己者也仕東廣憲府上事於臺予在

金陵見其所繪之圖所作之賦惻然憫之而不能為之  
謀也噫古者仕不出鄉不得已而去墳墓則踰境必哭  
以喪禮處之今四海一國無踰境之事矣然官遊去家  
之遠幾同昔人去國之悲終身為田舍翁浮沉閭里則  
可苟有四方之志者其悲殆不能免固末如之何也已  
陳君姑諱他日宦成而游倦息肩贛寓母墳旦旦在目  
父葬不出三百里外時往拜掃無難也四時祭祀得如  
常禮而於心無不安焉於斯時也此圖此賦焉攸用

題李太白墨跡後

昔年嘗觀謫仙所寫愛酒大夢二詩喜其豪宕邁逸因嘆其仙才美但意其於仙道或未之聞人頗不滿吾言今又獲觀元丹邱歌墨蹟神奇鬼恠尤恠其然其然信乎超出八極之表矣嗚呼世亦安得復見斯人哉仙才也夫仙才也夫

題耆英圖後

至治壬戌上距元豐壬戌二百四十一年矣至今尊慕

洛社耆英何也韓潞二相元勲碩望極品大臣重厚謙  
降畧無一豪富貴態同會九老里居常流爾而溫溫接  
待未嘗懈慢盛德如此其位冠一時名香後世宜也小  
器易盈之人名位未崇驕倨已不可近視二公相度  
為何如哉癯然一寒坐次最下者不數年間亦踵韓潞  
相業無他德相似也

跋趙子昂書麻姑壇碑

顏魯公麻姑壇碑在吾鄉舊碑為雷所破重刻至再字

體浸失其真今觀趙子昂所書妙筆也顏字趙字並出於王或勁正如端笏重臣或俊媚如時妝美女二者各臻其極然顏學王而字與王異趙書顏記而字與顏異非深造闢域不能知也後之君子必有工於評者劉時中王宣岩俱學書而善書此帖趙以畀劉劉以畀王蓋其所好所識相伯仲也是以轉相授受云

跋洪母熊氏傳後

翰林學士元明善作臨川洪畊母熊氏傳明善於人不

輕許其文不易得有此特筆洪母蓋賢矣哉書者翰林承旨趙孟頫篆者集賢大學士郭貫允謂三絕澄與畊同郡故識其後云畊今提舉江西等處儒學

題湯教授復學田詩後

昇學沙洲之田近年有權勢者奪取以畀其下一時職教者甘心奉之在後竟不復問無它罷嫖者不能畏懦者不德亦或因之為姦利者有焉今教授湯君至慨然以剔蠹剋敝為已任謀復其所失要路有人主之于其

上故其復之也始雖甚難而卒若易田既復諸儒咸喜歸功於教授作詩以美之教授曰上官之賜也吾何力之有噫湯君之於是事能有功而不自有其功是可嘉也其善不可以不書故書於諸儒美詩之後

題趙子昂臨蘭亭帖後

馮昌大世扁倉之業而書羲獻之字以趙子昂今之羲獻也得其所臨蘭亭帖寶之如金玉其伎藝家之清流也已

題皮疇小字四書後

皮疇病在膏肓而其父以其所寫小字四書示予父之  
慈宜速求善醫善藥以療疇之病俟病愈予有與之言  
者

跋牟子理感論

或毀仲尼吾徒曰人雖欲自絕曾何傷於日月乎世有  
謗佛之人使佛之徒能如吾徒一語足矣奚事多言踈  
山雲住師寄示此編予觀之蓋近時所撰牟子者寓言爾

非真有是人也

跋張丞相護佛論

宋東都之季南渡之初儒而最通佛法者有二張焉丞相商英侍郎九成也今觀侍郎之言精神飛動不作佛說而能使人恬不自覺以入于佛若丞相此論則厲聲色與人爭辨矣不知二張於佛所得孰深住師其以告我噫人苟知佛法如天又何以護為哉

跋章貢嚴盾書說

書經惟後晉增多二十五篇之文明白曉易其先漢伏  
生所傳者則詰屈難讀章貢嚴盾篤志嗜經博覽深探  
於書有說畧述梗槩如金屑花片雖未底渾全然嘗鼎  
一臠已可知已予也猶願覩其書之成

跋黃縣丞遺跡後

宋樂安縣丞黃先生特科出仕清介自持晚節避世不  
污全名以歿宋末之小官能如是者鮮矣予嘗客其門  
耳聞正論不一觀所著辭章槩可見其志操此編自述

先世名字行次生死年月與其葬處施及傍親外戚蓋  
唯恐子孫日遠日忘而有所不知也孝慈敦睦之情藹  
然溢乎筆墨之外其厚於倫紀為何如哉又欲效柳子  
厚作先友記肇端而不及竟其叔子革謂先君手澤唯  
此僅存將刻石以貽永久俾世世適長孫掌之幾不墜  
遺予反覆三而慨前脩之不可復見也歎歎而識其卷  
尾

題東溪耕樂圖後

至治癸亥趙公李明偕予待命翰苑其年四月李明至  
官迨秋適以疾去六月予始至官越三年泰定乙丑秋  
亦以疾去予家于野農夫晨夕雜處丙寅之春留邑偶  
值連日雨喜膏澤霑足土脉憤興思欲歸視畎畝聲鋤  
之事阻泥濘未行有客來自許昌携示東溪耕樂圖圖  
後繫以李明詩賦四篇玩誦之餘悠然有契於心耕田  
歌諳練農業可與幽風七月並傳能憂衆人作苦之勤  
又樂一已田居之逸憂與人同樂非已獨庶幾先天下

而憂後天下而樂者乎顧予老病無用雖不獲久相從  
於玉堂雲霧之間繼今倘遂北游共談稼穡於東溪烟  
雨之外亦此生一快也

題蘭亭臨帖

用剡溪紙臨蘭亭詩序字法雖與他本不同好事者俱  
收並蓄亦可以充寶玩之一若必欲追考其所由來則  
不可知矣

跋臨本蘭亭

蘭亭真蹟不在人間所傳臨本不一以上十紙字體各殊互有優劣有眼人擇其逼真者而學之斯可矣

跋徐僉書御製後

豫章徐可携示宋思陵所賜徐僉書俯宸翰一幅及僉書之仲子榕所受誥命兩通此其近祖宗初散騎常侍鉉則其遠祖也徐氏歷五代至宋南渡代有聞人鼎臣師川俱以文學著名垂後不泯於今猶存前朝所賜先世所受蓋難矣可字可聖敦樸多藝能亦不忝其先者

乎惜年踰五十而無嗣所存家寶其尚擇族從中之賢子而畀之哉

題秦國忠穆公行狀墓銘神道碑後

故太傅錄國軍重事開府宣徽使大司農太醫院使贈推誠佐理翊戴功臣太師上柱國秦國忠穆公西域竺乾國人自少得侍禁密眷注甚隆歷事四朝尊為國老官至極品生榮死哀今臨江郡侯其第五子也以公所受制命及行狀墓誌銘神道碑萃成一編鐫木以傳夫

公之行事國史載之矣而郡侯又顯揚之若是者將俾  
遐邇遠民咸知公之盛德大業也嗚呼秦公國之忠臣  
郡侯家之孝子澄忝嘗預史官見公一門忠孝之美樂  
於道之是以識其編末公諱鐵柯郡侯名益馬云

跋陳吾道贈言後

陳吾道善琴昔年嘗聽其聲唯恐妨吾到空同之夢而  
不欲聞自後塵緣不斷混混埃壒中竟未能償吾願今  
十有九年矣而吾道再至無可掩吾之羞乃謂之曰吾

且詣廣成子所一見過復子其携無弦之琴而來吾將以無聞之耳而聽當賞吾之知音不待黃金鑄鍾期也

跋皮氏所藏蘭亭

皮氏一門若尊若小俱知寶此子孫其將世有善書者乎

題伏生授經圖

伏生所授二十八篇真上世遺書也東晉後以增多之書雜之今之儒者或莫辨別闇亦甚哉

題采薇圖

韓子曰當殷之亡周之興武王周公聖也以天下賢士  
與天下諸侯往攻之未嘗有非之者伯夷叔齊乃獨以  
為不可殷既滅矣天下宗周恥食其粟而餓死夫豈有  
求而為哉適於義而已聖人萬世之標準也二子獨非  
聖人而自是信道篤而自知名特立獨行亘萬世而不顧  
者也微二子亂臣賊子接跡於後世矣韓子之言如此  
後人復何言哉采微之歌其辭鄙淺蓋好事者托之太  
史公輕信而誤取焉

題南廟王太尉禮神文

昔三閭大夫見楚巫樂神之歌鄙褻於是更定其辭九  
歌是已今郡邑皆有東嶽祠祠以王太尉配食崇仁縣  
南之祠尤靈異徼福者朝夕奔走太尉不知何時神嘗  
聞鄉先生寺簿黃公云蓋王文正公旦也文正公太平  
宰相功在社稷澤被生民唯天書一事律以大人格心  
之道不無憾焉扈從定陵東封岱嶽恩陞太尉其食於  
嶽祠也固宜友人吳倣作禮神文實寺簿公之說其辭

雅則其祀匪淫亦屈原九歌類也江西等處儒學提舉  
司吏目彭壽繕寫成帙而以示予為誌卷末

跋趙武德墓誌後

趙書記神明之胄今為清門獲覩其先世武德公墓誌  
百有餘歲周楊二鉅公手澤如新猶可想見風流餘韻  
嗚呼天之未喪斯文與書記之不墜其世也可尚已

題臺山遺藁後

余讀宋待制金陵李襄公詩至神宗挽詞喟然嘆曰君

者臣之所天也資於事父方喪三年其義不亦重乎公  
於君臣之義著矣當時文章妙一世者或有所不如何  
哉夫詩以厚倫為本倫之不厚詞之工也何取焉未聞  
臣之於君而可薄也公其得詩之本與公之第五子通  
直最工詩詩有唐人風致七言絕句尤長予於其家見  
所謂臺山遺藁吟諷累日志其左方而歸之通直諱畊  
字畊道

跋江徵君書思無邪三字

曹南江君玉藏其伯父徵君所書思無邪三字為家寶  
古人誦詩三百者必達於政思無邪三字又三百篇之  
綱要也君玉官于郡掾于臺政俱可稱其受用此家寶  
者與徵君嘗仕侯藩號觀察使至元之間徵至帝庭以  
直言忤時而退素名善書玩其心畫亦可想見其人

題孔檜圖

孔庭古檜舊聞夫子手植叔世遭燬疇不為之感傷得  
其燼餘或刻以為像或斲以為器尊之貴之愛之重之

而又圖寫贊詠以相傳播于以見魯俗之厚也雖然聖人所以遺後猶有大者也假諸物以像聖人之形未必得其似求諸已以會聖人之心即可得其真也其可尊可貴可愛可重蓋超出乎形器之外豈徒一木之所遺者而已哉有能思及於此否乎

吳文正集卷六十二

欽定四庫全書

吳文正集卷六十三

元 吳澄 撰

題跋

跋靜安堂銘

古今人言靜字所指不同有淺深難易程子言性靜者  
可以為學與諸葛公言非靜無以成學此靜字稍易夫  
人皆可勉而為周子言聖人定之以中正仁義而主靜

與莊子言萬物無足以鏡心故靜此靜字則難非用功  
聖學者未之能也大學靜而後能安之靜正與周子莊子  
所指無異朱子以心不妄動釋之即孟子所謂不動心  
也孟子之學先窮理知言先集義養氣所以能不動心  
大學之教窮理知言則知止集義養氣則有定所以能  
靜也能靜者雖應接萬變而此心常如止水周子所謂  
動而無動是也安則素其位而行無入不自得之意予  
讀靜安堂銘九十六言最喜艮止其背萬物之鏡八字

為其義竊觀長沙易先生於書之禹貢禮之周官說皆  
精緻卓然度越諸家而程子所續孟子不傳之學則有  
未數數然者故予每取其所長

鐔津文集後題

儒者之學一降再降而為詞章漢賈馬唐韓柳宋歐陽  
蘓遂挺然獨步得以稱雄於百世之下佛教自達磨西  
來離去文字真露真秘由是悟入者一彈指頃超詣佛  
地卓乎其不可及已其徒口舌機鋒鋸利捷巧逢者披

靡莫之敢膺然未有操弄豪管若儒流之滔滔衮衮演  
迤於詞章者鐔津嵩仲靈生值宋代文運之隆與歐陽  
曾蘓同時才思之瞻蔚筆力之橫放視一時文儒不少  
遜也噫世間多少魁傑人在佛氏籠罩之內如嵩者豈  
易得哉其文之行世久矣踈山住半間重繡諸梓以傳  
蓋喜其教中之有是人也昔歐陽公一見而推獎之予  
亦曾聞而嘉歎焉倘論詞章當為佛徒中第一或問嵩  
佛法何如予儒流弗能知弗能知請俟它日質之半間師

跋婁行所敕黃後

廬陵婁天章藏其八世祖奉議公敕黃一通出入與俱罔  
敢失隊為人子孫當如此矣今日六品官以下所授勅  
牒與前代勅牒其文同其用黃紙書亦同然昔也有勅  
而又有誥今則無誥而但有勅存之可以考古今沿革  
之殊可以表子孫保守之謹天章年甚少才甚俊文藻  
麗而思泉湧值今貢舉取士之時擇科階仕易易爾方  
將得今日之新勅豈但存先世之舊敕而已哉抑又有

說敕者人爵之榮於其舊者而能存於其新者而能得  
要皆身外物也人之一身先世遺體天爵之貴具焉保  
守其身不尤重於保守身外物乎夫子言孝立身為大立  
身者何行道於今揚名於後有天爵之貴非止人爵之榮  
也果能立身而揚名天下世世稱之曰婁之後有聞孫  
其光於奉議也殆將百倍於常人天章字行所才可  
以及是故予諄諄焉督其進

跋徐侍郎文集後

宋兵部侍郎清江徐公文章政事俱可稱遭值未運言  
不獲用志不獲伸國亡而身亦隕平生著述因兵亂散  
軼公之子幼學百計蒐輯十僅得其一二予嘗序其篇  
後十有七年公之孫鎰持刻本過予曰先人鈹先人侍  
郎集未竟而卒鎰暨第九成重加釘定成三十卷集外  
所遺及大學中庸說候續纂為一編予披翫三日凡公  
未用之言未伸之志莫不洞見其底蘊不特嘉嘆其文  
章而已嗚呼名臣之後有子有孫能若是侍郎公為不

亡矣復識其左方云

題聚星亭贊後

聚星亭贊朱氏為考亭陳氏作也今脩江陳氏得此圖  
於朱子門人胡伯量之家澄按宋紹熙之季趙忠定公  
汝愚將立寧宗時韓魏公之曾孫侂冑知閣門事嘗令  
白事高宗吳皇后宮事成侂冑謀建節忠定以為右戚  
不當言功侂冑惡恨羣險朋附之遂傾趙相竄永州慶  
元丙辰春殞于非命趙之死由侂冑也士人教陶孫有

詩閔趙曰九源若遇韓忠獻休問如今幾世孫趙相既死  
韓權益熾朱子褫職罷祠號偽黨魁此贊之作在庚申春  
未屬續前兩月所謂仕守之難古今共嘆蓋為倪冑發也澄  
舊題二詩其一曰真人此日暫東行曾柰黃星漸次明二  
姓聞孫竟如許一天瑞氣落西營其二曰魏公勲業照乾坤  
太史曾占五色雲三教家詩裏淚始知亭贊意殷勤  
適再見此圖乃寫前所題二詩于左而歸之脩江之陳

題東坡所寫墨竹

雖細稍低葉下近塵士而鉅竿老節慣傲雪霜于時  
坡翁居多竹之地三年矣

題子昂仁智圖

仁者樂山智者樂水先儒謂非體仁智之深者不能如此雖  
然仁者見之謂之仁智者見之謂之智各隨所見均是仁智  
豈必與尼山泗水同哉子昂所圖子昂所見爾以遺太  
乙劉師別有見玉筍仁智堂道士從劉得之又玉筍仁智  
堂之仁智也師劉者羅環中特以示予者羅之徒孫周常

清周而羅羅而劉劉而趙曰仁曰智其見同乎異乎予弗及  
知也方將循其支探其本邇其流尋其原以上達尼山  
泗水周今徃上清上清之山水奇矣其中高人仁智何  
若予亦願叅焉

跋玉笥山圖

名山道宮其形勢之奇人物之盛可與上饒龍虎山儔  
儷者江西有二俱屬清江閣漕也玉笥也余夙有山水  
癖又喜共方外畸人語五十年前於驛路望見龍虎山

四十年前曾至閣漕二十年前至玉笥之傍所謂太秀  
洞天者而獨未能一至玉笥焉道士周常清持示玉笥  
承天官圖覽之欣欣若游於其間然予之游山非但樂  
其形勢亦欲識其人物向游太秀亦為尋訪隱者不遇  
而退承天有超世之士為誰常清一一告我予將往問  
跋謝尚書墨蹟後

宋南渡後古文清江謝尚書為首稱而其文無集不可  
悉見龍山西福寺謝公平昔熟游之地嘗為撰雲海衆

堂記文刻在石而墨蹟照寺中間流落它處大德丁酉  
寺僧克齊再得故物於既失之餘襲藏唯謹可謂知所  
重者齊又醫藥濟人是能以佛慈惠心為心也齊之上  
普慧通儒佛書副講主席其上師乘又其上與俱俱師  
號不羣乘師號梅山慧號愚泉齊號石崖云

跋劉忠肅公與朱文公帖

劉忠肅公朱先生之父黨先生以乾道丁亥冬除密院編  
脩官劉書稱先生為編脩當是次年戊子之秋作劉公

憂江淮兩浙水旱豫為歉備其年建寧亦饑且繼之以水災又明年秋而先生丁母憂矣此書蓋在前也

跋李公釋尚書帖

李公釋尚書初年受發運使楊佐薦改秩公推其友劉琦佐曰不見此風久矣遂并薦焉議者兩賢之當時且以公之讓善為難而況于今適值廬陵李一初二公手帖因藏書而及公此事千百世之下亦有聞公之風者乎

跋鍾津文集

鍾津文戢戢如武庫兵涵涵如春江濤僧契嵩所著述  
也在宋慶厯嘉祐正當文運之隆敢出其技馳騁章甫  
逢掖之林肆口而言肆筆而書縱橫雄放莫或能嬰其  
鋒噫天之生才也何所限極哉佛家者流而有如斯人  
者乎踈山雲住師取其文鋟諸木期以傳久遠蓋喜同  
類中之有是人也噫誠可喜也雖然文儒則可佛法則  
未

跋吳君正程文後

往年予考鄉試程文備見羣士之作初場在通經而明理次場在通古而善辭末場在通今而知務長於此或短於彼得其一或失其二其間兼全而俱優者不多見也金谿吳氏家世以儒科顯君正出示程文一編三曰所試之藝悉具純美暢達無施不宜可謂俱優兼全者矣不特程文然也於文能儷語又能散語於詩能近體亦能古體才贍而學周若是倘命足以符其才豈有不遇者哉君正名應子

跋子昂楷書後

至元丙戌冬予始解后子昂於維楊驛明年在京每日相聚為予作字率多楷書不令作行草與今此卷字體一同人但見其後來寫碑文之字乃疑此卷非真是未嘗悉見其諸體字樣也

題四君子贈疎山長老卷後

李俞周昶薩德彌實持憲江西可稱無疵蓋鳳凰中之鴈雉麒麟中之獬廌也在都中予未及識然禪解盈紙

其出世間法不知與世間法何如四君子是同是異而  
於疎山雲住師俱厚善畢竟各有同處

又跋朱子墨蹟

朱子蔡母祝令入之地得之西山蓋其家每欲得葬地  
則必求之西山也

跋朱子書後

此朱先生母令人祝氏與其內親而先生為母代書者

題耕樂室

鄭子真耕於巖石之下鄧子真慕之而扁其室曰耕樂  
苟樂矣耕可也釋耕而仕亦可也非以耕為樂也雖耕  
亦不害其樂也子之樂也如之何

題韓魁公墨蹟

嘗觀東平府學碑富鄭公書其字端謹莊重不作媮媚  
婀娜之態韓魏公此帖亦然而加勁健二公事業不在  
於字而觀其字畫亦可想見其為人

跋李公遺墨

制參李公年二十有四擢進士科五十有六而值厯運  
改浮湛隱約吟詠自怡垂三十載乃終里中易先生伯  
壽甫儒而逃於醫與公同生嘉定辛巳歲相好如兄弟  
過從倡和未嘗旬月疏逖也公之手簡往來意真語質  
雖待先生之子濤禮視朋友不以父黨自居也濤收拾  
公之詩詞手簡大小百餘紙集成一編不惟它日易氏  
子孫得見當時二父交契之情而鄉人觀之亦足見前  
輩慊厚之風可以敦薄而寬鄙於世教非小補也濤字

景源云

題崔氏孝行詩卷

真定崔使擢卿相繼宰兩邑建平而崇仁俱有美政昔得之傳聞今得之親見適一二客來過周行東西南北之人也頗通四方政俗善評一時人物相與聚談其一曰崔侯何以能若是其一曰史侯喬木故家也同知真定路總管府事之孫兩浙江淮漕運使之子史崔真定巨室二姓世為婚姻侯丞相史忠武公之孫督其舅兩道宣慰使則丞

相之從子其外祖五路萬戶則丞相之昆弟也內外兩族仕宦  
赫奕世德可師家範可采固與寒門新進之居官者不同也  
而予之子文留邑日從侯游處携侯孝行詩卷以歸蓋侯初  
仕常熟州判官居家養母寧不赴官士大夫嘉其行有  
詩頌美者累數十余獲觀之夫以天性之愛根於心者為重  
人爵之貴加於身者為古人之常事今世則希有侯能為  
今世之所希由其資識之超於人也孝者百行之首居  
家而孝於親則居官而慈於民者餘事爾侯之行爲孝

子其政之為循吏也宜

題李氏世業田碑後

青塞李氏其先魯人宋靖康建炎間避金難轉徙而南顛  
頻十數年始履吉之境當時閔恤流民令所在郡縣安養  
李氏自出力闢曠土得田四百畝請于官官畀之為世業  
於是自記官事勒石以貽永久期與子孫宗族共享公上  
之賜又推所餘及親故處心蓋廣且遠并載給田守俸令  
佐姓召示不忘所自時雖紹興八年記之者李興時書之

者其族父知建昌縣李德祥也終宋之世田屬李氏大元營田  
司立乃奪而歸之官李之子孫輸租耕其田如昨舊碑亦  
被人竊負而去幸猶有墨本存焉裔孫業圖再刻石以  
不墜祖之所付託而予為書于碑陰嗚呼紹興而  
至元百五十年爾田之有予有奪彼一時也此一時也  
為之民者如之何哉事之已往者已矣未來者自勉可  
也業其倡率宗族人人彊為善苟為善子孫必有興者  
其興也將有光于前而四頃之田一片之石已失者又

奚足芥蒂于懷也哉

題夏幼安更名說後

蘭谷夏幼安於其舊名有所不安而一更之遂以字行  
勇矣予嘉其更名一事之勇而慮其施之於他事皆然  
則不能無失也謂之曰人能勇於去其所不安可也而  
輕於就其所安不可也蓋勇而重者多得勇而輕者多  
失勇固可尚也然識為先勇次之勇者去其所不安而  
不吝識者就其所可安而不誤審其所安的見其可而

後遷有識有勇者能之不然一時之輕他日之悔見其不安則將又更之乎此易之頻復所以不勉於厲也慎之哉勉之哉

跋吳氏家乘

金陵吳梓之大父德和甫暨父堯章甫暨母王氏夫人俱得當代能言者銘墓繫之以名勝哀挽之辭為一編藏于家志顯親也不唯是日夕孳孳工文飾行以思自厚其躬其於顯親也又有大焉吳氏有子哉

跋金陵吳承信建炎四年戶帖

此帖百八十三年矣而保之至今吳氏子孫其賢乎噫  
承信公之所積可知也宗家子其謹識

題剛簡胡公印歷

往年於剛簡公家見其奏藁讀之流涕為綴數語于後  
今在洪又見其印歷觀畢愴然

跋李平章贈黃處士序詩後

平章政事李公以公輔之尊而友處士之賤贈之以詩

章重之以序引可謂忘勢謙已者矣然君子之言皆寫其心之實表裏無二致也公之詩云逃名君笑我伴食我慙伊善哉言乎蓋亦一時姑為是言而已非實以人之笑已之慙而懼者也使公果能惕然於人之笑慙然於已之慙則其相業宜不止如後來所觀序所謂終當借五湖舟訪予於空明渺瀰之際晚節而踐斯言也豈不高出一世也哉噫


跋河南程氏外書

昔大程夫子仕上元縣故建康有明道書院以祠二程  
近年行臺治書侍御史郭侯嘗命山長趙晉之重刻程  
氏遺書於既燬之後今錢塘沈天錫嗣長書院而曰有  
遺書無外書是二程夫子之遺訓猶未完也乃續刻外  
書十二卷以補一家之言余嘉其知崇先哲以啓後覺  
也再為識外書之左方

題吳山樵唱

吳伯恭弟叔從新能詩古近二體之態度聲響俱占最

上品克極所到何可當也曰天興吳門產絕奇喪子曾  
為景曾噫如何長吉敦夫死又見恭從二妙詩



吳文正集卷六十三

欽定四庫全書

集部

吳文正集卷六十四至六

御史<sup>臣</sup>邱文愷覆勘

武英殿纂修編修<sup>臣</sup>吳廷選

欽定四庫全書

吳文正集卷六十四

元 吳澄 撰

神道碑

元贈中奉大夫吏部尚書護軍清河郡元孝靖

公神道碑

孝靖公姓元氏諱貞字器之通奉大夫湖廣等處行中書省叅知政事明善之父也始者澄識叅政於其少壯

時視其才氣壓羣於諸經諸書爬剔糾結貫穿端杪其吐辭也雄以則期其文學必為中州第一後十餘年被遇先帝選充宮僚繼入翰苑歷侍制直學士侍講侍讀即除禮部尚書叅知中書省事兩典貢舉凡所選擢悉自聖衷浸浸向大用元之系益出拓拔魏其先或云河南人後徙魏之清河累世積善孝靖公仕為小官有才不獲施有德未獲報水木之有原本一旦發於是生者貴而死者亦貴以公爵榮公之王考諱興王妣彭氏生

三子其季公之考也考諱海誠篤和厚與人無競嘗攝  
官政多所全活年八十有六而終妣高氏淑範遠識豫  
知其孫必顯每指示人曰此孫骨氣非常他日能大吾  
門年七十有五而終合葬清河祖塋生五子最幼者公  
也公讀書起家受將仕佐郎杭州在城酒使司知事再  
受蘆漚鹽場管勾蒞官為政恥儕庸流著廉能聲然輟  
藏深廣人莫能窺也至元己丑三月廿有三日以疾卒  
於蘇州年四十有七夫人弭氏同縣人公卒之次月十

有四日亦卒享年如公之數生一子二女子叅政也女適王適李大德甲辰十月某日葬清河新阡從遺命也公孝親友於兄仁於宗戚高夫人盛夏病背疽三月不愈公夫婦衣不解帶養不離寢子吮瘡去膿婦以手搨糞見者稱嘆目為孝子孝婦至大庚戌叅政任翰林侍制恩贈公奉議大夫驍騎尉清河縣子弭夫人清河縣太君延祐丙辰叅政任禮部尚書特旨封贈二代加贈公中奉大夫吏部尚書護軍追封清河郡公謚孝靖弭

夫人追封清河郡夫人而公之考贈嘉議大夫秘書監  
太卿上輕車都尉追封清河郡侯謚貞惠公之妣追封  
清河郡夫人延祐己未叅政自中書叅議再為翰林侍  
讀自翰林侍讀出叅湖廣省政事其明年春新天子遣  
使召入集賢為學士澄已病留江州邂逅水驛謂將樹  
碑於孝靖公之墓以澄之舊也令為文既不可辭乃叙  
其世次大概而繫之以詩叅政娶李氏初封清河縣君  
再封清河郡夫人其子晦有旨特授將仕佐郎通事舍

人特遷承務郎典瑞院判官明年又特加奉訓大夫皆殊恩也幼曰萬女一其詩曰

繫昔郡公才鉅志崇養疾致憂孝出天衷卷韜金綸尺未試分卑卑小官而不緇塵天嗇其躬身後則豐有爵有勲有謚有封壺儀婉美上暨考妣烜赫綸恩光耀閭里我原其初施腴報腴維善之積維慶之餘允也貞惠口活萬死爰逮於公彌厚厥祉皇澤沄沄孰大吾門維公有子貞惠有孫維公有子維帝嘉止窮碑勒辭百世

有煒

大元榮祿大夫宣政使領延慶使贈推誠佐理

功臣太師開府儀同三司上柱國齊國文忠

公神道碑

公北廷人也諱潔實彌爾曾祖父某贈資善大夫中書  
右丞追封高昌郡公謚康懿曾祖母某氏追封高昌郡  
夫人祖父博察脫忽鄰贈榮祿大夫平章政事追封齊  
國公謚莊靖祖母拜撒納追封齊國夫人父伊蘇鼎

爾贈銀青榮祿夫夫司徒追封齊國公謚恭惠母巴爾  
德濟追封齊國夫人恭惠生五男其二伊德實是公之  
仲兄其三公也年十八其仲兄年二十三俱詣京師伯  
父引見世祖皇帝仲兄在帝左右敕公給事東宮公恪  
勤謹愿朝夕常侍裕宗說賜鈔二千五百貫俾受部人  
實訥有二女長女妻公仲兄而次女為公之夫人中書  
省奏立延慶司授公朝列大夫同知延慶司事裕宗嘗  
謂公曰高昌回紇人皆貪惟女不染汚俗倘日用不足

於我乎取一日覲晏裕宗問故對曰有家書來詳詢父母安否何如不覺遲久裕宗曰何不將父母就養乎公對曰人子之心孰不懷親奈相去萬餘里資糧靡屨之費重不能辦也奉旨馳驛往迎一歲乃至遂得終養以盡孝省臺有機密事裕宗令傳旨公辭不堪任使裕宗曰以汝沉重言乃不漏泄是以命汝裕宗升仙事徽仁太后成宗踐祚太后命公送顯宗就國公疊疊具道太祖皇帝世祖皇帝宏模遠範及往古近代所行善行美

德可法可鑒者顯宗然之賜衣一公還白太后大喜成  
宗曰汝善處吾兄弟之間陞嘉議大夫賜玉鞶帶香串  
帶各一太后升仙成宗駐蹕柳林亟召公謂公曰汝今  
當以事吾父母之心事我授資善大夫同知宣政院事  
領延慶使宣政所掌者僧往往黷貨徇私公一新極飭  
凡事如省部例人曰宣政院為御史臺矣成宗聞而嘉  
獎謂裕皇篤眷此人真有知人之明臺官嘗欲擢用公  
以不開風憲辭成宗得末疾公與尚醫理御藥不暫離

夜不就寢寢不解衣或數月或期年留中盛夏病暍人  
勉其還家治疾公曰聖體尚未康為臣敢愛身乎惟啜  
淡粥數日自愈其事上聞有旨曰濟蘇穆爾一心愛君  
寧不愛身此人所難能又廉介甘貧賜平江路田五十  
頃以贍其家進授榮祿大夫宣政使領延慶使至大初  
命譯佛經賜鈔五萬貫興聖太后謂公為先太后舊臣  
復令領延慶使辭以年老不許延祐間議錫國公爵辭  
以無功乃止於是但仍舊職而升延慶司乃正二品公

忠於君孝於親敬以事兄廉以持已常戒諸子曰兄弟  
宜和睦永久毋分異也儒書宜習讀財利毋耽嗜也延  
祐二年十月十六日薨年六十三其明年二月十二日  
葬大都路宛平縣之漆園至治三年贈推誠佐理功臣  
太師開府儀同三司上柱國追封齊國公謚文忠夫人  
埽克封齊國太夫人子男三達爾瑪實哩榮祿大夫宣  
政院使薩克繖翰林侍讀學士中奉大夫知制誥同修  
國史蘇蘇資德大夫湖廣等處行中書省右丞女二孫

男五阿南達實哩阿裕爾巴喇伊瑪克塔實哩伊拉瑪  
實哩阿裕爾實哩女二公之仲兄官於功德使司初以  
奉訓大夫為經歷未幾同知司事轉少中大夫繼受正  
議大夫同知總制院又受正奉大夫宣政副使而同知  
功德使司事並如前後乃同知宣政院事轉資政大夫  
資德大夫贈存誠秉德功臣太傅開府儀同三司上柱  
國追封齊國公謚忠穆維文忠公來自遠域以廉勤慎  
密結主知恂恂然有周仁石奮之風諸子皆賢能至顯

達擬於世勲之家云予與公之仲子侍讀在翰林國史院同僚以其將樹碑於公之墓隧乃為叙公家世官秩而繫之以詩其詩曰

若昔裕皇毓德青宮前星曷明勲放華重攀鱗附翼海會川同譽旄萃止濟濟清忠齊公西英翩然來東帝曰予嘉咨汝往從比于坊案汝職汝供維公敦敏夙夜靖共裕皇徂方聖子御龍天寶儲才敷遺成宗帷幄舊人金玉宸躬至大延祐眷渥彌崇曾未耄耄奄逝匆匆四

朝左右一節始終生死俱榮褒贈有隆錫之九命國以上公說說良亂卓犖龐鴻聿為時彥咸代天工奕葉其光增賁前庸銘詩不朽如勒景鍾

元榮祿大夫平章政事趙國董忠宣公神道碑  
董氏在河北號勲臣家其先諱俊起自猷畝勇力絕人金末應募長民兵既歸國朝知中山府以敢戰先士卒授龍虎衛上將軍左副元帥後攻金歸德死城下追謚忠烈再世諱文炳令橐城二十餘年有惠愛數立戰功

以叅知政事從丞相巴延平江南功最諸將進中書左丞相贈金紫光祿大夫平章政事謚忠獻公諱士選字舜卿忠烈之孫忠獻之子也至正九年忠獻築兩城於正陽以遏宋兵十年宋將來爭霖雨淮漲舟師薄城忠獻與戰矢貫左腋創甚不能弓城幾危公年甫二十一代父臨陣獲宋一將敵退城遂完忠獻發正陽趨安慶十一年與丞相大兵合十二年公敗宋師於洪河口丁家洲大兵順流而東抵焦山宋人聯絡大艦絕江劔戟

蔽天衆憚莫敢前公大呼突擊挫其前鋒諸將繼進兩  
軍皆殊死戰聲震山嶽飛矢如雨戰自寅至午宋軍力  
疲敗走是夜聞宋將逃入海公乘輕舟追之舟小不勝  
浪亡其維楫衆大恐公色不少變俄頃風便適與大兵  
會衆咸喜公曰神天相佑也爾何知海寇張瑄有衆數  
千自宋時獷悍忠獻命公偕招討使王世強招之公單  
舸造瑄所諭以威德瑄降得海船五百艘却其餽遺忠  
獻奉丞相約分道趨宋都既至諸將爭趨財物府公秋

毫無犯慰安士民市肆不易諸將猶出郭抄掠公言於  
忠獻下令禁止遠近帖然丞相歸奏功授公宣武將軍  
管軍總管佩金符宋臣以二王航海次福州閩尚為宋  
守公從忠獻定閩十四年班師扈車駕幸黑城進秩明  
威將軍改佩金虎符十六年立前衛親軍進授勇大將  
軍充都指揮使建議設廬舍開屯田由是居者得安行  
者有養千夫長以下自擇者叅半樞密院以斷事官為  
公之副公以其不由軍功進表千戶姜廷珍代之師討

日本自願効力世祖曰士選勲臣之子他有委任僻遠  
小夷無勤其行二十三年僉湖廣行樞密院事移疾去  
官以指揮使讓其弟士秀二十四年世祖征納延公聞  
有召命先期率數騎詣軍世祖大喜謂公曰使汝父在  
朕可不自至此軍中多夜驚丞相已延奏用董士選宿  
衛公領漢軍夜直軍令肅然世祖曰朕得安寢矣戰捷  
還京是時權姦僧格置尚書省以專國政公雖居閒常  
得預機密事世祖指公示僧格曰此人庶直汝知之乎

公持正不履權門雖不樂公亦不能加害二十八年世祖將誅僧格夜遣近侍召公入謂公曰僧格讒慝貪婪朕不私一人以病天下命平章博果密與公商度僧格及其黨皆抵罪時相獨庇江淮省平章賽富迪音復立行泉府司俾之典領以徵舶商之輸謂國家出財資舶商往海南貿易寶貨贏億萬數若賽富迪音黜商舶必多逃匿恐虧國用世祖信其言公曰國家竭中原之力以平宋不得不取償於南方然新附之地人心驚疑初

阿哈瑪特以約蘇穆爾賊湖廣庫克新賊江淮民曰此  
聖上未之知爾及二賊誅民曰聖上果不知也僧格以  
賽富迪音賊江淮其毒甚於庫克新民怨之入骨又曰  
聖上亦未之知也今僧格之黨皆逐而賽富迪音獨留  
恐失民心民心一失收之甚難得財貨之利輕失民心  
之害重何況海商家在中土其往必復行省自能裒其  
所有何以賽富迪音為世祖瞿然曰此言是也再三嘉  
獎賜公白金五千兩授驃騎衛上將軍江淮行省左丞

陞辭日問公讀曹彬傳乎對曰嘗讀世祖曰彬止是不  
殺降一事汝父之功過於彬汝效汝父足矣汝父清苦  
自勵平宋不戮一人至今民感其恩今命汝江南之民  
見汝猶是汝父汝其悉心蘇凋瘵之民以稱朕意先是  
楊僧立司於杭總攝僧教貪淫驕橫莫敢誰何公受密  
旨明正其辜械之於市士民聚觀稱快公興利除害惟  
恐負臨遣之命同列多不協歸覲於朝世祖與語自日  
晏至夜且曰卿以同列非人而勇退彼自為惡汝自為

善焉能挽我改僉江南行樞密院事浙有澱山湖聚衆  
流之水豪民塞湖營居水無所潴汎溢蘇湖間為居民  
害有議及者輒受賂而止公令有司撤其居而復為湖  
成宗嗣位授資善大夫江西行省左丞贛屬縣有狂民  
為亂公往平之得所籍鄉兵姓名十餘萬公曰此蓋脇  
從良民焚其籍賊巢近地之民阻山為砦以自保公屏  
衆單騎登山遣人諭之曰知汝皆良民懼官軍戮爾身  
俘爾孥是以固守今省官親在此汝宜出見民皆釋然

執壺酒迎拜曰天遣公來活我公曰汝可率妻子復業  
諸砦之男女悉從公下山約束無得擾害贛民以寧有  
誣告富戶數十與賊通謀公使掾元善鞠之自伏其誣  
杖死於是無敢污蔑良民者公離贛民數萬遮道拜送  
曰父母生我人於有生之初今公生我於既死之後我  
無以報德惟天能報公也遂立生祠祠公焉遷南臺御  
史中丞入僉樞密院事時軍政蠹壞卒兩之長應昇職  
而無賂者遲遲弗昇淹滯數百餘人連歲旅食甚至凍

餒乞丐公視例當予者即日發遣俾各還營壘殷輔貪黷不公悉遭決罰汰裨校冗濫之員者省征夫重難之以紓軍力會御史中丞博果密卒朝議難其繼時相有所舉用成宗曰廉介公正誰能出董士選之右惟此人可特授資德大夫御史中丞領侍儀司事公言昔阿哈瑪特僧格敗世祖嘗謂臺臣緘默今御史舉劾必令有司覆實蒙古翰林院宣政院及僧司所行多壞法亂紀而御史臺不得預是沮遏臺臣不使之言也非世祖意

宗正處斷大辟但憑言語口宣無吏牘可覆視人命至  
重寧無枉濫合如諸司詳具獄辭御史臺審覈無冤乃  
可施刑臂鷹隼飼駝馬之徒擾民特甚宜嚴禁戢京畿  
平糶等處饑請弛山澤之禁而禁釀穀價得不踴江西  
富家有親子而立異姓子為長子藉其資以游俠傾動  
朝野致位行省叅政其親子既長懼不得久專其家異  
姓子之弟結寇夜入殺其親子而歸獄於無辜之人賄  
偏中外勢援盤結其屈莫得而伸或訴於臺公究治明

白以其狀上聞異姓子之兄弟俱棄市復其故姓而家  
資悉歸於親子之子公論黜之左丞劉琛以征八百國  
之利惑時相公入諫成宗曰朕意已決卿其勿言公曰  
臣居言職事關利害豈敢阿徇遐荒不靖當遣使誚詰  
設有不服興兵未晚今其過惡未著師出無名暑天瘴  
癘山路險遠征行之苦轉輸之勞奚啻動百萬衆竊慮  
變生意外他日臣有不言之罪成宗曰朕不汝舉也又  
見時相言損有用之民取無用之地時相曰彼地出金

何謂無用公曰國以民為寶不以金為寶康爛其民而圖得金豈國之利哉時相不悅師遂西果大衄供饋道斃者亦數萬成宗曰吾愧見董士選矣召公與省臣議公曰首將非才貪兵冒進其敗宜也惟當赦遠撫近厚恤死士之家斬劉琛以畢其誤國殄民而已又言近年以來星芒垂象霜殺蠶桑饑饉洊臻災延太廟上天之譴告至矣皆執政非人澤不下究宜蠲積弊與天下更始出為江浙行省右丞徙河南不赴武宗立除河南江

北行省平章亦不赴仁宗初與弟士珍俱召除榮祿大  
夫陝西行省平章歲餘謁告得旨給驛還家灌園種田  
琴書自娛賓客過從談笑終日世事了不關心卧疾五  
載竟弗療至治元年正月二十三日薨年六十九二月  
二十三日葬於九門先塋之東贈某功臣某官追封趙  
國公謚忠宣夫人張氏無子封趙國夫人諸妾有子者  
各以子貴受封子男十守恕懷遠大將軍前衛親軍都  
指揮使守愚先卒守愿守慤皆大夫太常禮儀院判官

守思奉訓大夫保定路遂州知州守惠命為弟士秀後  
某某某女二一適資善大夫典瑞院使張某一在室  
孫男九鑑鏐欽其六幼孫女一適千戶王某其餘幼昔  
忠獻內範莊栗言笑不苟一作一息無非義方公少而  
就傳漸漬詩書閑練禮法坦明易直沉毅雄偉南征北  
討大小數十戰臨難勇赴應變奇捷義死不以為懾倖  
生不以為榮既解軍柄請還虎符世祖不許曰雖位至  
宰輔猶佩之以旌伐也處大事決大議色和而語壯必

斷之以經術惟以國之利病民之休戚為心它有弗便  
弗顧也異己者雖甚忌公然私竊心服曰正人也里人  
為不善畏公知之族人詣公辨曲直望門輒止受累朝  
寵錫歸必分賚宗黨之貧者軍中所俘獲遺命命諸子  
悉縱為民家徒四壁立意豁如也比其終廩無遺粟庫  
無遺財嗚呼真古所謂大丈夫哉澄也嘗辱公知公歿  
之三年承乏史館公之諸子將樹碑墓道乃遺書公行  
事大概如右而詩之於其左公所居之縣曰橐城屬真

定其詩曰

臺城之董三世殊勲忠獻有子忠烈有孫維忠宣公弱冠即戎損軀而前莫當其鋒忠臣報君孝子從父不殺如彬底定南土折衝奮力洗洗武夫立朝正色侃侃文儒衛率重權推讓介弟閑退七年常預密議苟利民社知無不言驟忤貴倖百挫不遷入司宥府軍政整肅出釐省務吏姦戢縮薦賢為國匪市恩私公不自多衆或鮮知視彼有善若己所能舊家名胄汲引同升士出門

下類成大器微而卒史咸至膺仕秉心如鐵堅莫可摧  
赴義如川勇莫可回其廉於身一介不取其惠于人千  
金亦與涖官可畏嚴嚴秋霜居家可愛藹藹春陽資用  
屢空志氣靡慊生甘澹泊死之莫歛猗嗟殄瘁星隕山  
頽千載九門墓石崔嵬

故光祿大夫江南諸道行御史臺大夫贈銀青  
榮祿大夫江浙等處行中書省左丞相上柱  
國魯國元獻公神道碑

公忙兀氏名伯都高祖畏答兒薛禪事太祖皇帝敵所  
懷戰大捷腦中流矢踰月隕命論功封萬戶太宗皇帝  
益以泰安州二萬戶封其子忙哥為郡王與十功臣並  
曾祖鐵木合祖唆魯火都從征伐立殊勲數瀕於死父  
博魯歡初為斷事官世祖皇帝命翦李璫有功又治大  
獄稱旨進昭勇大將軍右衛親軍都指揮使加金吾衛  
上將軍中書右丞取江南時統軍下淮東諸郡宋平益  
封桂陽僉書樞密院事繼授甘肅行省平章政事江南

諸道行御史臺大夫病免乃牙叛率五諸侯討之並高  
郵五百戶真食以江浙行省平章政事終於位贈推忠  
宣力贊運功臣太師謚武穆而公祖父贈推忠宣力佐  
運功臣太尉謚忠定曾祖父贈純誠保德翊戴功臣太  
尉謚武毅三代並階開府儀同三司勲上柱國追封泰  
安王母王氏封泰安王夫人故母怯烈真氏札剌真氏  
祖母唐古真氏曾祖母斡吉剌氏俱追封王夫人公自  
幼穎出不以貴戚世家自滿比長學不急事武穆王克

修子職或勸之仕以不忍違親遠去辭王終事母夫人  
王氏益謹人稱純孝伯仲間欲析異故產任其自取悉  
弗與較捐已資以嫁諸妹上而朝議下而士論靡不以  
公為善人無一可疵者大德五年御史府上其才行擢  
為中順大夫江東道廉訪副使十年改中議大夫江南  
行臺侍御史明年江南大饑遣屬驛聞請以十道贖金  
罰鍰賑濟轉少中大夫僉書樞密院事至大二年進階  
資善江南行御史臺大夫四年進階榮祿遷治陝西行

臺武宗賜玉帶一及錢五萬緡公固辭不允則受緡錢五之一又不允然後受延祐元年授光祿大夫甘肅行省平章政事時米直踴甚公通治糧道其年直頓減明年又減計歲糶之費省緡錢四十萬有奇兵饟既足民食亦饒仁宗嘉其功賜錢五千緡及海東名鷹甲冑弓矢三年冬關陝有變公抵岐王府謀議檄各鎮兵執叛黨修武備得民間馬五百匹以助進討四年遷江浙省治以不擾民情大悅仁宗賜珠衣勞獎召為太子賓客

輔道靡有缺違上書陳古先聖帝正心修身之道仁宗  
嘉納賜衣一復除南臺御史大夫興聖太后以賓客宜  
朝夕侍儲宮止其行既而公目疾作辭官退居淮南之  
高郵英宗至治元年又命為御史大夫以目疾不拜詔  
以平章祿養於家仍飭內臣馳馭江南求空青治其疾  
二年春來朝賜金文衣及藥一缶復南還三年賜錢五  
萬緡及西酒西藥公辭謝謂曩膺重寄猶懼弗稱今已  
病廢豈敢濫叨厚祿且受重賜乎竟不受賜并歸所給

平章祿今天子泰定元年公再來朝疾愈革上遣侍醫  
診視賜駝乳良藥卒不起薨於京師贈銀青榮祿大夫  
江浙行中書省左丞相上柱國追封魯國公謚元獻朝  
議公無生業母老子幼賜錢二萬五千緡臺臣又奏賜  
錢三萬五千緡仍以前所辭平章祿給之其夫人固辭  
曰始夫子仕於朝且不敢虛食廩稍今歿矣苟是祿非  
夫子意也夫人治喪悉從古制又築室買田顧護兆域  
踰時太夫人王氏亦喪夫人毀戚殊劇人愈歎公德之

其刑於家者如此夫人翁吉刺氏右丞太納之女生男  
一女一公歷仕四朝顯揚中外然謙抑不居以故聲譽  
不赫赫表暴於世薨之日橐無遺金槨無鮮衣聞者莫  
不嗟悼焉翰林直學士馬祖常狀公行而朝之人俾前  
翰林學士吳澄文其墓道之碑澄固常聞公德美於是  
叙列所狀如右而作銘詩以綴於左銘曰

堂堂世卿猷然弗矜優優才能退然弗勝克孝克誠先  
德是繩友弟恭兄靡計嗇贏內行之完治移于官不歲

不園吏戢民安累朝眷遇匪頒異數或受或否具中節  
度晚違望苑歸卧淮甸臣衷慕戀一再入見入見之時  
皇心孔怡天不憖遺疇不吁謐帝哀耆舊送終從厚而  
公良耦陳誼不苟措紳聞言嘉嘆貞堅謂公忠賢教始  
閨門猗公盛美嗚呼已矣彰于百世史氏所紀

元故中奉大夫嶺北湖南道肅政廉訪使鄧公  
神道碑

故中奉大夫嶺北湖南道肅政廉訪使姓鄧氏諱文原

字善之其先蜀人寓杭甫再世蚤慧工文年十有五已  
中進士舉建南服歸國市隱弗耀訓授生徒以給親養  
雖處窮約事生喪死必盡歡竭誠未嘗肯輕出謁鉅公  
敬禮每造其廬當路多知名年三十二浙省檄充杭學  
正大德戊戌部注崇德州教授越四年辛丑授應奉翰  
林文字越五年乙巳陞修撰至大戊申考滿進階仍舊  
職越三年庚戌出任江浙儒學提舉皇慶壬子又為國  
子司業延祐丁巳遷翰林待制明年戊午僉浙西道肅

政廉訪司事又明年己未改江東道至治壬戌召為集  
賢直學士癸亥進階兼國子祭酒泰定甲子直經筵其  
冬移疾去官明年乙丑以翰林侍講學士召又明年丙  
寅除湖南憲使俱不赴致和戊辰五月二十二日甲申  
終於杭年七十子衍書來曰先君不幸至於大故既葬  
矣而墓石未銘也先生知先君深者敢以為請澄適卧  
病得書而哭病小間乃追憶舊事初至元間吳興趙承  
旨孟頫子昂為澄歷言其師友姓名而善之與焉及善

之為翰林應奉澄始識之繼由翰林待制出江浙時澄  
官胄監得錢其行又其後以集賢直學士兼祭酒時澄  
承乏禁林次年同預經筵之選嗚呼孰謂後予十年而  
生遽先棄予而沒乎哀哉善之丰姿溫粹儀矩端嚴其  
教於家塾鄉庠國監也從學者皆有長益詩文淳雅瑩  
潔如玉字法遒媚與趙承旨伯仲趙既逝欲求善書人  
舍是殆無可應詔持憲兩道游仲民寃至今有遺愛祠  
苑代言史館修書悉合體製在儒臣中聲實相副者也

有文集內制彙讀易類編具存官階起將仕佐郎至承  
德奉訓大夫至中奉曾大考從黼妣楊氏大考昭祖累  
贈嘉議大夫成都路總管上輕車都尉南陽郡侯妣雍  
氏追封南陽郡夫人考漳累贈中奉大夫四川等處行  
中書省叅知政事護軍南陽郡公妣孫氏游氏俱追封  
南陽郡夫人其配南陽郡夫人徐氏前一月卒子衍承  
父澤儒林郎江浙等處儒學副提舉女子子柔嘉柔官  
石洞書院山長史公埜司徒府掾史戴孟淳其壻也孫

男萊孫其葵七月十三日癸酉其宅湖州路德清縣千秋鄉百寮山之麓徐夫人祔系本衛鎮西將軍苗裔去秦入蜀居資徙居綿之彰明叅政公避蜀兵難始寓杭云銘曰

岷峨鉅儒前有相如王楊三蘇宋遷南裔若李若魏卓爾拔萃繫吾善之蜀產之遺際今明時藝精點染文焰爍燁輝映琬琰帝制皇墳撰述討論身沒言存澄清攬轡仲枉出滯驅蝮殄獠提誨諄諄承學彬彬具稱聞人

中朝望竦宸極優寵急退何勇天祐者賢未應奪年曷  
為其然刻詩墓隧昭示來世知者墮淚

上卿大宗師輔成贊化保運神德真君張公道

行碑

周之中世至人神人出焉其心有得於天地之所以廣  
大造化之所以長久而以無為自然為道見而傳之者  
關尹氏聞而傳之者蒙莊氏也其說之衍自周之末閱  
秦之亂至漢之初遯身而避世之士往往能髣髴其緒

餘故張留侯受教於下邳之老父曾相國受教於膠西之蓋公一則以之佐高祖而創業一則以之佐惠帝而守成孝文承其遺風玄默恭儉俗化篤厚民底殷富天下太平幾於刑措明效章章如此是以漢初知老子闕尹蒙莊之道而鮮獲知有堯舜文王周孔之道也當時叙學術以道屬之老子目其徒為道家者流列於儒家者流之上學術既裂宗孔氏者謂之儒宗老氏者謂之道士儒不得以與道之名而道士得以專道之名夫通

天地人曰儒儒而不通天地人其不與得道之名也固當名以道士而不稍闕無為自然之藩其得專道之名也寧無其實不稱之慙乎唐宋間道士名存實亡況其教與世而俱降視無為自然之道霄壤矣皇元太祖皇帝開基時則有全真道士託老子長生久視之說以自神逮世祖皇帝混同海宇而神德真君張公入覲上悅即兩都皆建崇真宮居之公鶴身虬鬚川行山立晨夕密勿欲清靜簡易與民休息所言深契宸猷於是寵遇

日隆比於親臣俾公號天師公辭避命議公稱號必極其尊廷議曰上卿維宜乃號公上卿夫天子之卿六而冢宰第一為上諸侯之卿三而司徒第一為上冢宰者天下之相也司徒者一國之相也以古天子諸侯之相稱公尊之極矣公之少嘗值相者謂公位極人臣神仙宰相至是而其言果驗未幾又號元教大宗師成宗朝加同知集賢院事武宗朝加大真人同知集賢院事位大學士上尋加特進仁宗朝進開府儀同三司陞輔成

贊化保運勲號玉刻元教大宗師印以授故公掌教幾  
五十年天下宮觀賴公徭役之奏慈儉之化者其何可  
言及厭世而英宗皇帝嗟悼遣大臣臨賻勅有司禮葬  
於縣之南山公厯事五朝聖眷如一越十年而今上皇  
帝特封神德真君昔公之存也宮禁邸第鉅族故家待  
令如神明朝廷館閣大臣達官禮公如父師際會之榮  
尊貴之極從古以來未之有也而公視之若無未嘗萌  
絲髮滿假之意瀟然山間林下之臞仙非其天質之美

冥合老氏不欲盈之道何能若是且有長在已而不自  
矜有功在人而不自伐丁時之盛而不處其盛都本教  
蔑加之名躋官階極品之位而逡巡殿後斯所謂去甚  
去泰不敢先者乎累聖錫公皆范金為冠集寶為飾衣  
裳縷金織文佩綬劔履貫珠絡玉其直不貲而公平居  
常服取其澣濯上尊之耐大官之膳日有餽而公飲食  
菲薄不逾中人觀乎此則知公以服文彩厭飲食者為  
非道矣予固怪公卑抑之過而公終身弗改其素接人

不問貴賤少長俱致優重畧無慢忽噫不可及也已老子言王公以孤寡不穀為稱道之好下賤也南華言博真人以懦弱謙下為表道之惡驕夸也公其亦然歟公之弟子薛玄義以予之善公喜公也勸予述公道行予故撫公之行凡侔於老子之道者書而道外之物烜赫一時炫耀流俗人所共歎羨者不書也公諱留孫字師漢信之貴溪縣人也其徒入室升堂予所及知者嗣大宗師曰吳全節行嗣師事曰夏文泳有職掌者余以

誠何恩榮孫益謙李奕芳毛穎達舒致祥主御前宮觀  
者薛廷鳳丁應松張德隆薛玄義餘百十人載蜀郡虞  
集所撰公墓志集曰公門人多聰明特達有識量材器  
可以用世而退然謹守其教師友間雍雍恂恂如古君  
子家法則公之道其可以淺近議哉澄於公之道行既  
書之如前復詩之於後詩曰

聃也猶龍玄天為宗本賤基下忌高畏崇歆焉不盈維  
道之盅輓世還淳邇彼皇風漢初救敝爰躡遺蹤休息

瘡痍民和年豐皇元混一俊乂雲從有方外臣自外留  
中治務清靜謀協淵衷出入禁闥天寵日隆聖子神孫  
眷渥齊同惴慄尊榮感幸遭逢純誠報上隨事獻忠五  
朝一心善始善終繫神德君卑讓謙恭不居其誠不有  
其功敦兮若樸符德之容懿茲行實與道混融愧修孔  
道疇克如公述公道行以勗我躬

吳文正集卷六十四